

Caya Mario E. Harms nombra pa un pionero

Dia 18 di januari di aña aki Con-
seho di Minister di Aruba a dicidi
di cambia e nomber di e parti di
Lagoenweg entre Zoutmanstraat
y LG Smith Boulevard pa Caya
Mario E. Harms.

Cu e decision aki, Gobierno a
duna reconocimiento oficial n'e
vision di sr. Harms y su curashi
pa loke el a haci setenta y ocho
(78) aña pasa tempo cu su famia
a bira e prome Arubianonan pa
bay biba na Lagoen.

Mario Eusebio Harms tabata un
pionero. E tabata un pionero
den deporte na Aruba. E tabata
miembro di e prome ekipo di
futbol tempo cu Domi Eijbers a
introduci e deporte na nos isla.
Como empleado di Lago, Mario
Harms tabata un pionero. E ta-
bata e prome Arubiano cu a yega
na eherce un puesto di supervi-
sor den Mechanical Department.
Un pionero tambe ta un persona
cu a yega caminda otronan no
a yega. Na aña 1934, tempo cu
Lagoen no tabata mas cu un rooi
sushi, ningun famia Arubiano
tabata biba den e area aki. Pero
Mario Harms, cu su vision di un
bario bunita na cant'i lama, a

namora e sitio. El a hinca su mes
den debe grandi pa cumpra
un pida tereno, laga traha un
cas y muda su famia den loke
tabata Lagoenweg Noord 135.
Asina e famia di Mario Harms
a bira e prome famia Arubiano
den e area aki. Mario su vision
no a lag'e na caya. Awe Lagoen
ta limpi y bunita. E bario a bira

importante y e ta sede di un
monumento impresionante,
Monumento 18 di Maart, ca-
minda pueblo di Aruba ta honra
e curashi di otronan cu un vlam
eterno.

Den un forma mas humilde,
Gobierno a honra e memoria di
Mario Eusebio Harms pa su vi-
sion y su curashi como pionero,

dunando e caya aki su nomber.
Tempo cu Gobierno a cambia
nomber di Lagoenweg Zuid pa
Maria Christinastraat, Lagoen-
weg Noord a bira simpelmente
Lagoenweg.

Di awor en adelante, e ta Caya
Mario E. Harms. Dia 16 di maart
di 2012, dia cu Mario E. Harms lo
a cumpli 118 aña, su nietanan

Marla y Karen Harms a desvela
e borch di caya cu ta carga su
nomber. Loke cu famia Harms
no a spera y ta un berdadero
sorpresa, tabata ora cu sra. Win-
nie Ponson, haciendo Catharina
Building e prome edificio cu un
adres di e nomber nobo. Catha-
rina t'e nomber di mama famia
Harms, esta esposa di Mario E.
Harms, kende ta prima di tata di
Winnie Ponson. Despues di sinta
na rand di Lagoen pa un rato
cu tabata parece un eternidad,
Clyde Harms ta bisa el a recobra
su forsa, drenta su auto y core
bay cas. Como un mensahero
di shelo, e atardi ey sra. Winnie
Ponson a yam'e pa particip'e
cu e edificio nobo cu lo bin na
Lagoenweg 3 lo carga e nomber
'Villa Catharina', na honor di su
mama. Un gesto di aprecia.

